

新編
樊山

批公判

讀精華

東溪
堂
原本

新編 樊山公牘精華卷六

恩施樊增祥嘉父

札西安府

札西安府尹署守知悉。案照興平因捐聚衆一案。昨由劉參戎張委員會稟到司。藉悉民情安靜。惟首先聚衆之劉坎坎。劉三瘋子未獲。當經本司批飭張令。先將劉錫純。張鵬翼。任四。任鍾鍾解省。一面勒令該村紳耆保約。速將二劉交出。卽由劉參戎帶犯拔隊回省。旋據張令回省面稟。劉錫純等四人。已經帶到。並呈縣卷二宗。復據稟稱。各堡士民。現皆追悔無及。恨爲錫純所愚。詰以聚衆罪大。何遽冒昧聽從。則稱十年以前。該邑曾經兩次聚衆。皆未辦罪。是以此次相率求恩。並非鬧事等語。此則綱紀弛於前。故風氣刁於後。愚民以麇聚爲故常。並不知爲犯法之事。亦可憫矣。此案發端。由劉錫純借免捐爲名。歛錢肥己。及錫純鬧堂被押。嗾其弟坎坎。糾約十七村民人。挾官求釋。若曰我爲衆人免捐。反致一人頂罪。衆心何安。坎坎弟兄濟惡。不惜出死力以求援。而刀匪劉三。本係楊令因案嚴拏在逃未獲之犯。是以首先叫噪。借羣力以快其私。是此案自始至終。可恨可怒者。兩三人而已。張代書之子。昏無所

知任姓二人。冥頑不靈。較傀儡而能言。方走狗而不足。案結後。重笞數百板。押發回縣。或枷或不枷。聽楊令區處。劉錫純業經楊令詳請奏革。此時發府質訊明確後。令將已入己之錢。一齊繳出。發還各村。仍交兩縣管押。俟奉批斥革後。然後重責押發回縣。由闔縣公正紳耆保領。嚴加管束。此時在押待罪。每三日或策或論。或經義。由該府出題面試。如其不通。痛打戒尺。切勿輕輕放過。劉坎坎到案。質訊明確後。重責八百板。鎖押發回。鎖繫鐵杆巨石五年。劉三瘋子到案。質訊明確。重責二千板。錄銬發回。鎖係鐵杆巨石十五年。俱俟期滿查看稟奪。除已到四人。早經該府收管外。合併縣卷一齊札發。札到仰該府查照來札事理。即行遵辦勿延。切切此札。

詳撫部院

爲詳請立案事。竊維陝省各屬屯更糧石。有本有折。皆以各州縣去省遠近。分別徵收。其本徵折色者。無論矣。即離省較近。本折聽民自便者。亦係折色多而本色少。現在本局入款。以折色之錢爲大宗。從前道倉積弊。亦始以折色之錢。爲展轉牟利之資。終以折色之錢。爲上下公分之利。其收本色也。正耗之外。有餘糧。有土糧。有樣糧。合計其數得若干。則以抵作額糧之數。而改收折色之錢。其收折色也。每一京斗。牌

價照市斗九折。卽以隨時折入之錢。收買糧片。多抵本色。再約其買片所抵之數。加收折色。以飽私囊。買片愈多。則折色亦愈多。牌價愈大。則獲利亦愈大。糧片者。兩倉所給旗兵以爲領糧之券也。每月放檔之期。旗兵持片到倉打現糧者。十無三四。餘皆按糧定價。以片易錢。旗兵應領之片糧。不盡出倉。但售錢則不啻其已領矣。公家應填之本色。並不實買。但銷片則不啻其已填矣。以大致言之。不過買片以補正額。而餘利自此出焉。何以言之。片糧之買價。必小於折色之牌價。折色所收一石之錢。不止買旗兵所賣一石之片。片糧係大斗。又多於牌折之京斗。賤價買入一石之片。又不止抵貴價折入一石之糧。層層抽取。所餘實多。本色之餘一利也。片色之價二利也。牌價多於片價三利也。片斗大於京斗四利也。逐層算抵。正額旣敷。則凡所餘折色之錢。皆餘利也。皆私款也。其實皆弊端也。上自糧道。下至倉書斗級。無不處脂分潤。習爲故常。官幕猶傳舍也。書吏則窟穴之矣。上年前憲台奏裁糧道員缺。將糧務歸併藩司設局專理。本局接辦以來。博訪周諮。通盤籌畫。因從前之弊端。旣屬相沿已久。而裁缺之本旨。又主於報効歸公。所有一切辦法。悉以因弊爲利。化私爲官爲主義。業將開辦章程。詳請前憲台具奏在案。數月以來。一切辦理就緒。前之所謂

弊者。罔不爲利。前之所謂私者。罔不在官。惟積弊所叢。一旦搜剔淨盡。固須有一不易之法。以爲現在之遵循。更須有百變不離之宗。以杜將來之弊混。夫銀糧出入。貴於簡明。彼此套搭。節目糾紛。則吏之所樂。而官之所苦也。從前兩倉。有所謂長短帳者。紅單房主之多立名色。而力求其不簡。故爲紆迴。而力求其不明。煩碎繳繞。莫可究詰。外人聞之。而不能見。糧道雖見之。而不能知。管倉之幕委。雖知之。而不能盡。拱手受命。按股分錢而已。錢之何以能有此數。又何止有此數。則皆不能了了於中。莫不飲食鮮能知味。由來久矣。現既一概歸公。則向之惟恐人知者。今則惟恐人之不知。向之惟恐盡知者。今則惟恐人之不盡知。所有兩倉本折銀錢出入各數。謹於清冊之外。附簡明表一分。按月呈齎憲署。以便稽核。表之所不能備者。冊以詳之。冊之所不能簡者。表以約之。提綱挈領。縷晰條分。一目了然。無可遁飾。曰本色正耗之外。土樣各糧附焉。曰折色本價之外。單票各數附焉。曰買片片糧之外。以所買粳米現糧附之。曰抵補折色現糧之外。以所買各色片糧足之。曰雜入糧不在正額之內者也。曰雜入銀徵解自各州縣者也。曰錢易銀以折色之錢。按照市估隨時易入者也。曰報効卽原案歸公之數。由局解司者也。曰捐支糧糧道未裁缺以前。如省城留

養局。兩縣囚犯口糧之類。各有捐糧。現仍援案辦理者也。曰局用錢。局用銀。倉局薪工火食雜費。及各署公費。胥以隸之。曰餘糧。餘錢。餘銀。則一月之後。綜其出入。以計盈虛者也。此十四項。不必一月之中。各項俱備。細數皆同。有無多寡。均隨其本。眞逐條登註。惟必須聲明者兩端。本色項下。土糧樣糧兩宗。向係約畧收取。並無確數。現在改章伊始。欲悉數裁汰。則弊除而利亦微。既恐報効無出。欲明定數目。又恐閱時既久。視同正供。以致土樣之外。復有土樣。現時一仍其舊。無所更張。約計其數。每收本色一石。至少不下平京斗一斗五升。至多不過一斗五升五合。若以上月之數校之。下月斷不能斗升悉合。顆粒無差。此其一。抵補折色項下。小麥粟米。豌豆三種。歷來價值不甚懸殊。向來辦法。兩倉各折各抵。不相通融。若在一倉。則但須抵足總數。不復細分糧色。譬如折色小麥千石。以小麥片抵之也可。卽以粟米豌豆各片抵之亦無不可。惟粳米價值較昂。必以粳米片乃能作抵。而此項米片。散發到旗。有上月之片。遲至下月不領者。有上年之片。遲至下年不領者。或三五年。或七八年。往往有之。欲買片則不願賣。欲發米又不來領。欲購儲米石。以備不時。則紅朽之虞。又勢所難免。惟有存儲米價。隨時應付。願賣片則給錢。願領糧則買米之一法。去年冬季

分。因倉有餘糧。融抵一次。已將粳米折錢。歸入報効。此則因時因事爲之。未可以爲定例。現在四月分冊表。仍有折色未填。粳米四百餘石。職是故也。又其一。抑本局更有請者。徵收糧石。不過本折兩宗。本色有斗斛。折色有牌價。猶屬衆目昭彰。惟片價一項。一買一賣。彼此直接。索價若干。還價若干。眞出價若干。實得價若干。旁無與聞之人。卽最易蒙蔽之事。兩倉入款。以折色爲大宗。折色出款。以買片爲巨數。稍有不實。全局皆非。命脈所關。最爲重要。前因紅單房盤据把持。從中漁利。而改設官糧舖。現在官糧舖所辦之事得人。則前日之弊。卽今日之利也。不得人。則今日之利。卽後日之弊也。現在改章伊始。慎選委員。尙無慮此。特弊生於久。政舉於人。旣無百年不敝之法。卽不敢謂以後必無舞弊之事。語云有治人。無治法。及無治人。則更不可不有治法。應請嚴定章程。以後收買糧片。敢有重尋故轍。因緣爲奸者。無論數目多寡。一經查出。立予詳參。由憲台批示定案。永遠遵行。峻法在前。庶幾知所儆惕。不致驅狼進虎。病及公家。竊查陝省屯更各糧。共二十萬數千石。夏糧居十分之四。而稍強。秋糧居十分之六。而稍弱。本局自去年十月開辦至今。七月有餘。秋糧甫經畢事。數月之中。牌價極小。片價適中。買片之數。與從前亦屬不相上下。而核計折色所入之

錢除買片抵補之外。猶餘錢二十二萬三千一百四十餘串。以一串七百文。買銀一兩計之。合銀約十三萬一千餘兩。以秋六夏四計之。餘銀總在二十萬兩以外。若以後牌價加大。片價加小。買片再加多。能加半則利亦加半。能倍蓰則利亦能倍蓰。現在接辦之初。和盤托出。所有盈餘之數。目前可以一望而知。將來更可以依此爲例。實於陝省理財之道。不無所裨。所有本局賚呈表冊緣由。理合詳請憲台批示立案。再上年冬季分列一總表。本年自正月起以後。卽按月造齎。合併聲明。爲此具呈。伏乞照詳施行。

送陝西高等學堂學生留學東洋序

出洋游學者多矣。餞送之詞亦多矣。千人一口。千篇一律。其文則合時文公牘。而一之而間雜以新名詞。言者聽者。皆自以爲剴切沈痛。卽吾亦以爲剴切沈痛也。吾又何以贈諸君子哉。雖然彼所言勿論。數見不鮮。究亦無當於吾陝之情事。與吾意中所欲言。則吾言又烏可已也。自同治間。湘鄉相國奏派學生出洋游學。天下從風。頃年吾師張少保。總制兩湖。湘鄂諸生。徧布環球學校。自餘諸行省。亦各有人焉。爲囑于之和。獨吾陝闕如焉。此非吾之吝而固也。風氣未開。士無遠志。一新政繁興。事須

漸及。二根柢未固。難語開通。三年少遠游。無人督率。四三年以來。秦人士皆自力於學。而有志於開通。新法亦次第舉矣。而蜀中徐子修孝廉。適至儒而俠者也。志於聖賢。生而豪傑。吾乃用尹仇兩君之言。請於濰縣中丞。精選兩高等學堂。官費自費。生四十餘人。以孝廉爲監督。詣日本留學。而以興平令楊君爲考察官。舉一切學生之流弊。監督皆能滿滌而規切之。無假鄙言。加吾學術譾薄。自少至老。僅能讀四子書。其爲諸生臨別之贈者。仍吾中國聖人之言耳。論語曰。志於道。中庸曰。知恥近乎勇。志不立。則事無成。知恥不若人。則終爲人役而已矣。諸生試思之。明治維新之初。其學於泰西者。不先於曾文正。由今以觀。文正所遺。容閔馬建忠諸人。其視伊藤陸奧何如也。甲午之役。葉魏諸軍。其視大島圭介何如也。三十年來。彼國勢日張。而吾益弱。彼實業日精。而吾益窳。彼人心士氣。日益團結而猛起。而吾益渙益墮。所以然者。人人不立志。而知恥不若人也。庚子以後。偏立學堂。擴張新政。然試求諸人人之心。與夫上天下澤。交通之故。則其散漫而壅塞者。殆無以異前而又加甚也。先聖先儒。大抵責己不責人。務實不務名。愛國不愛身。計功不計利。今之謬論。專責政府。指斥朝廷。及問客何能。則喁然無具。所謂新學者。獵皮毛而已。志富貴而已。不得富貴。

則怨望怒罵而已。倖而富貴。則亦甘爲人役而已。嗚呼。學新學者皆如是。何顏責政府哉。韓子曰。業患不精。無患不明。行患不成。無患不公。兩官方持高爵厚祿。以待天下非常之士。文武一體。滿漢一氣。以盡洗有司不明不公之舊習。諸生學而有成。何憂韜玉於山林。而遺珠於滄海哉。且使人人皆賢皆才。則雖如探籌積薪。皆足以得人而濟事。然則不才而僨事者。雖用人之過。而亦人人不自力於學之過。爲士者獨不自愧耶。諸生勉之哉。遠涉東瀛。去家萬里。父母倚於門。少婦嘆於室。慎居處。節飲食。謹暑寒。遠聲色。衛生之要術也。惜分陰。戒游談。勤術業。志遠大。成業之梯杪也。修羊燈火之需。吾故鄉萬人之膏血也。舟車衣糧之費。吾官師銖寸所裒積也。吾父吾兄。割骨肉之愛。而使之遠游。台司郡縣。不辭供億之煩。而資之就學。其待之者何如。而其所責望者何事。諸生而無愛親敬長之心。則已。人人有心。將必人人力學。其忍徘徊歧路。蹈襲狂迷乎。况吾中國。事勢如此其亟也。種族如此其衰也。學成而歸。轉相傳習。寸炬千燈。一鳴萬和。則光緒一明治也。西都猶東京也。天下之重。後生任之矣。若今無異於昔。後更不逮。令羣雄相偪而來。父母妻子將僕妾於他人。墟墓田廬。恐沉淪於異族。興言及此。其不發憤忘食。自力於學者。豈獨非人情。亦決非吾三

秦子弟。忠孝沉毅之性質也。諸生行矣。經旅順眺大連。日露礮火所爭持。倭完而倭破者。皆吾土地也。泊長埭。指馬關。甲午城下之盟。擲金二萬萬之處也。北望遼陽。戰血未乾。遺骸滿目。我太祖太宗發祥之所也。西望故鄉。五年以前。兩宮蒙塵。所巡幸也。西南望中華全國。風潮洶湧。海氛蔽天。吾黃帝堯舜億萬萬子孫。所僑寄而託命者也。諸生勉之哉。取人所長。益我所短。吐吾之故。納彼之新。救及身之危。圖萬世之安。期於各得其精華。而仍不自漓其根本。我不若人。惟當自奮。不當自餒。卽稍能趨步人。益當自勉。不當自足。日置吾身於薪膽之中。而預懸人格於歐美之上。積憤求通。增高繼長。以吾華人之聰明。棄其嚆昔無用之學。而人人求爲有用之材。何實業之不成。何國恥之不振。勉之勉之。學成名立。三年來歸。河嶽騰光。桑粉表色。吾將與三秦父老。張樂設飲。相見於霸橋之上。光緒三十一年歲次乙巳八月朔。恩施樊增祥序。

札募兵各州縣

爲札飭續募事。案照此次添練新軍。係奏明遵照練兵處咨行新章辦理。爲武備更制之始基。尤陝民自強之命脈。本司自五月札行該州縣。出示曉諭招募。七月始飭

委員分赴覆挑。三月之久。該州縣乃富平僅募十名。耀州僅募七名。白水僅募六名。韓城僅募十九名。一到本軍。又汰去富平二名。耀州三名。白水一名。韓城十六名。富平逃去二名。耀州逃去三名。現在只有富平六名。耀州一名。白水五名。韓城三名。如謂民氣不揚。觀望裹足。何以鳳翔能募至百名。朝邑能募至五十餘名。不惟多也。而又甚整。其餘亦三四十名不等。該州縣與鳳朝兩處。地不懸殊。竟草率至此。其於此等事。扞格而不解所謂。直可謂之糊塗敷衍。而視若尋常。終不免於游滑。練兵爲新政最要之事。該州縣於委辦者。尙漫不經心。其他如本地興學興工藝諸要政。心早已置諸腦後。無動於中。該州縣以不辦事爲得計耶。本司當有以待之矣。合亟由四百里嚴札申飭。爲此札仰該州縣。刻卽遵照前後札飭事理。迅速續募。逕送本軍。不必俟委員覆挑。倘再玩延。定干未便。抑本司尤有爲該州縣告者。地方官之辦事。全在平日能取信於民。官好則令易行。反是則動滋疑畏。迨事辦不勤。而嚴符迭被。如是丁差四出。騷擾不堪。而百姓反受其累。該州縣當切實曉諭。俾民間知練兵所以爲民。敗其愚瞽。自能樂從。毋得因循之後。繼以顛預。致滋擾累。切切特札。

會臬司札西安府

爲會札查勘事。案奉撫憲批發。西木頭市鄉約斬大發等。上控羅觀察仗勢侵佔。填築陽溝一案。奉批羅道係丁憂人員。應早遵例回籍守制。何以尙留省城。卽令暫作厲公。偶興土木。何至慢無界限。侵佔官地至八間。寬八尺長之多。況經咸甯縣親勘之後。應已審明舊基。又何至不講理法。仍前侵越。所呈一面之詞。殊難憑信。惟據呈羅道將陽溝填實。有礙水道云云。查西木頭市街道。本不甚寬。若如所云。則於該處街道。大有妨礙。或係工頭家人等。蒙蔽該道越界興工。抑係該鄉約等不明事體。無理取鬧。仰布按二司。督同首府縣。親往該處認真勘驗。究竟舊日牆基。係在何處。是否侵佔官地。據實會稟候奪。切切。詞發仍繳等因。奉此。查此案該鄉約等。歷在各衙門上控。本藩司批駁未准。本臬司批查未復。茲奉前因。若遽信爲實。則觀察年高位顯。豈有侵奪官地。填溝阻路之暴行。若盡以爲虛。則鄉約非醉非癡。又豈有造捏奇情。誣告道員之大膽。合行會委查勘。以分虛實。而示大公。札到仰尹守督同易令李令。卽日前赴西木頭市。切實查勘。羅道買屋。其四至各抵何處。此次修造。有無越界侵佔。及填塞陽溝。挖出棚木鐵窗。傳約飭領情事。逐一查明。迅速稟覆。以憑詳請撫憲察奪。本兩司立等回話。切速此札。

札富平縣

爲札飭查拏事。案照前次該縣募兵焦彥魁。孫彥彪。先後逃去。札飭查拏。未經報獲。茲於本月初一日。該縣募送本姓游之田玉其。又復潛逃。並拐去發給新製青洋斜布棉衣褲一套。洋巾一條。青布靴一雙。實屬冥頑已極。合亟拏辦。爲此札仰卽作速認真查拏。以必獲爲主。該令辦此事。殊不經意。募數既少。逃者又多。若再視爲具文。則本軍威令不行。各勇效尤必衆。是該令一人壞吾法也。必欲以老吏自居。視要政如兒戲。試思本司能容之否。特札。

札定遠廳

爲札飭事。照得地方之美利。以貨產爲宗。貨產之振興。以工藝爲本。陝省民俗苟安。不知工作。故贛之磁。晉之鋼。每歲行銷本境者。不可以數計。該廳到任以來。留心工藝。因舊有磁鋼二項。竭力提倡。去其土法。教以新式。雖不能遽臻精美。已變其粗陋規模。前將新製磁器。呈驗到局。業經本局批示嘉獎在案。今該廳瓜期已及。忽又留署。皆因此二事。欲資熟手。俾竟全功。若使後效無成。則今日留之。隨時仍可去之。合行專札飭知。爲此札仰該廳。振刷精神。認真興辦。務使陶冶日臻精美。鐵礦日益開

關。本局注意於斯。斷非發一通稟。呈一樣範。即可搪飾耳目者也。磁窑鋼板。均以製造之精粗多少爲實憑。斷不能敷衍。亦無待密查。奉札後。即將現在磁鐵兩項。如何求精。如何推廣。推廣必須添本。求精必僱良工。先將籌畫情形。詳細稟報本局。兩三月後。必責實效。萬勿油滑敷衍。自干譴撤。勉之慎之。切切毋違。此札。

札興安府

札興安府黨署守知悉。照得該府所屬之白河縣。上控獨多。及經發委覆訊。雖有控情不實者。亦有原斷失平者。夫以上控十起。而有五起不虛者。可知縣斷千案。必有五百案失平矣。如謂民情好訟。何以尹守在白河時。絕無一起上控。又何以他縣上控皆少。而控干令者獨多。干令並非壞人。而信任家丁。牢不可破。此不但負殃民之愆。抑且有違旨之罪。合行札飭。札到仰該守嚴切查明。該令是否能勝白河之任。劣丁蠹役。是否仍前橫恣。据實稟訴。勿稍徇庇。本司與干令何嫌。惟念天下人之小有才者。皆可器使。好人之糊塗者。最足誤公。不能矜一人而害百姓也。切切此札。

牌示

白河附生李夢彪。前因其故父借用官錢。係其師姜善繼經手。慮善繼追索。遂附和

羣不逞之徒。告訐其師。案經提省問明。善繼被誣屬實。本司以爲其父卽負欠公項之人。該生控師。不啻自控其父。批飭洵陽縣查取年貌。具詳斥革。而該縣辛署令。形同殍殍。半年之久。未見縣詳。而該生反來高等學堂投考。綜閱兩場文藝。不無可取。然欲以能寫能作之功。拆其不孝不弟之罪。重文輕行。遺本取末。豈惟背教諭之宗旨。抑亦敗學堂之聲名。本司不敢出也。仰該生持批。馳回洵陽。長跪師門。涕泣請罪。姜紳長者。若肯代爲稟祈收錄。則庶幾可以爲學生。亦庶幾可以爲人子。本司教人。先從本原上說起。文藝何足道哉。

詳督部堂

爲詳請暫留署任事。竊署維南縣知縣丁禧瀚。前蒙督憲奏調赴甘差遣。當經行知該令。並飭准補斯缺之李僑。前赴新任。各在案。丁令在維年餘。百廢具舉。今當交卸。到底不懈。頃接該令三稟。一添設中學堂。二種樹。三罪犯習藝。所言之剴切。字字皆心血結成。除原文通稟有案。邀免重錄外。本司伏查種樹習藝二者。規模已立。表冊可尋。李令猶可循照辦理。惟學堂爲今日急務。又屬關中創舉。七十餘廳州縣。眞能心知其意。遵照奏定章程。參酌所屬地方人格物力。切實興辦者。至多不及十人。丁

令則牧令中之師範也。陝西各府之中學堂尙未全設。而雒南一縣。獨於高等小學堂之上。增置中學堂一所。其言曰。雒源小學堂。中多成材。督課年餘。按之奉發高等小學堂章程。實已突過。自科場停止。堂外諸生。皆願就學。而限於小學程度。不能深造。據京官陳綬等公稟。歲籌的款二千串。以強半籌辦中學堂。弱半籌辦小學堂。修建堂室。增添科學。稟祈立案前來。細核來章。兼綜中西。精通學制。盡心規畫。實力舉行。譬之築室。甫具畫宮於堵之形。未竟土木丹青之用。經曰。爲政在人。兵方制勝而易將。徒方受益而易師。後效難期。前功恐廢。李儵雖長者。然到任之始。民未相信。則收捐難。不諳西式。則建築難。不知科學。則延師難。不習管理。則用人難。就使丁令告知辦法。派定職司。而一能一不能。縱有格式而不知所爲。縱有教習而不爲所用。正如名手畫稿。以拙手皴染點斲之。必不能登諸屏障矣。本司反復以思。萬難遷就。擬請仍以丁令留署雒南。俾該縣所設兩堂。告成一手。現值洵陽署事年滿。卽以李儵調署。亦可勝任。本司明知督憲幕府。需才孔急。何敢擅留奏調之員。惟願借寇君。古有成案。今丁令治績不減寇恂。雒人喁望迫於河內。憲台愛民愛士之心切。於光武必能俯如所請。留署一年。一俟該縣中學堂辦成。卽令解任赴甘。上供驅策。又念憲